



欽定四庫全書簡明目錄卷七

史部十

時令類

歲時廣記四卷

宋陳元靚撰分四時為四卷雜引諸書所記關於節序者按月分隸據錢曾讀書敏求記卷前尚有圖說此本已佚之矣

御定月令輯要二十四卷圖說一卷

康熙五十四年大學士李光地等奉勅撰因明馮應京戴任月令廣義刪其蕪雜補其闕遺徵

引詳賅而義例簡括于授時政典尤為明備不但  
縷述事寔點綴歲華也

### 右時令類二部二十九卷

### 史部十一

### 地理類

### 三輔黃圖六卷

不著撰人名氏蓋六朝舊笈而唐人刪補故晉灼  
註漢書引之而中又有唐地名也所記皆漢代三  
輔古跡而於宮殿苑囿之制條分縷析尤為詳備  
故錄冠宮殿簿之首

### 禁扁五卷

元王士點撰凡十五篇分目一百一十六所記皆  
歷代宮殿門觀池館苑籞諸名其曰禁扁者考何  
晏景福殿賦曰爰有禁扁勒分翼張註稱說文扁  
從戶冊署門戶也扁與扁同云

### 右地理類宮殿簿之屬二部十一卷

謹案晉有宮殿簿之名劉知幾史通表志篇  
欲祖其規模別創一志今從知幾之說以宮  
殿簿立為子目冠地理類之首

### 元和郡縣志四十卷

唐李吉甫撰舊有四十七圖冠諸鎮之首至宋已  
佚此本又佚七卷有半今以宋人重編水經注例  
各註所闕仍釐為四十卷古輿圖之存於今者惟  
此書為最古

太平寰宇記一百九十三卷

宋樂史撰史進書序頗譏李吉甫之漏缺故其書採撫繁富惟取賅博人物藝文多所登載蓋地理之書至是而記錄始詳亦至是而體例大變焉

元豐九域志十卷

宋王存等奉勅撰始於四京次以二十三路終於省廢軍州叙述簡括而體例詳於元和太平興國二志於鄉鎮之名土貢之數皆一一具載

輿地廣記三十八卷

宋歐陽忞撰前四卷先叙歷代疆域提其綱要五卷以後乃列宋郡縣名其前代州邑宋不能有者

亦附見各道之末名曰化外州體例特為詳整

方輿勝覽七十卷

宋祝穆撰書成於理宗嘉熙己亥時中原久棄所述者南渡疆域而已於名勝古蹟多所羅列詩賦序記所載尤繁至於建置沿革疆域道里田賦戶口關塞險要之類皆在所畧蓋為登臨題詠設不為考證地理設也志乘之盡失古法自是書始然亦久而為例矣

明一統志九十卷

明李賢等奉勅撰其體例悉仍元岳璘等大一統志之舊故書名亦沿用之編次頗為疏舛然職方圖籍必考沿革於歷朝既此書尚存即不容闕明一代故錄之以見勝國之疆域焉

大清一統志五百卷

乾隆二十九年奉

勅撰初於乾隆八年纂輯成書嗣以

天威震疊戡定西域拓地二萬餘里而府州縣併省改

隸與舊制亦有異同乃特

詔重修迨削平兩金川之後販章益廓亦並載焉體例

雖仍其舊而蒐羅彌廣考證彌詳允足昭大同之

盛

右地理類總志之屬七部九百四十一卷

吳郡圖經續記三卷

宋朱長文撰分二十八門徵引博而敘述簡其曰

續記者吳郡有大中祥符中官撰圖經長文於元

豐中繼有此作也

乾道臨安志三卷

宋周悰撰原本十五卷今惟存首三卷其第一卷

記宮闕官署題曰行在以別於府志可為都城輿

記之法

淳熙三山志四十二卷

宋梁克家撰凡分九門朱彛尊跋謂其附山川於

寺觀未免失倫今觀其人物惟收科第土俗特出

謠識亦皆非法然大旨在于考求掌故不在述鄉賢

誇名勝未可以常例繩也

吳郡志五十卷

宋范成大撰凡分三十九門典贍而不蕪雜為地志之善本藝文即附各條下不別立一門亦足以滌冗濫惟汪泰亨所補與本書相混頗嫌清雜

### 新安志十卷

宋羅願撰願古文在南渡以後稱作者所學亦傳是志自序以為儒者之書具有微旨不同抄取記簿非夸也

### 剡錄十卷

宋高似孫撰乃所作嵊縣志嵊故漢剡縣地故名曰剡錄徵引賅洽多唐以前遺文軼事其先賢傳必註所據之書可為地志紀人物之法其山水紀仿酈道元水經注例脉絡井井亦可為地志紀山

水之法

### 嘉泰會稽志二十卷開慶續志八卷

會稽志宋施宿等撰續志張湜撰宿書終於嘉泰元年辛酉寶慶元年湜為續錄辛酉後二十五年事迹併補正前志之訛闕宿嘗補綴其父元之東坡詩註湜嘗撰雲谷襟記其學皆有根柢故是書亦具有條理

### 嘉定赤城志四十卷

宋陳耆卿撰乃所撰台州志稱赤城者梁代舊名也以所屬五縣事迹藝文條分件繫頗有體裁明謝鐸嘗續之寔遠不迨據書錄解題原本尚有十三圖今已佚矣

寶慶四明志二十一卷開慶續志十二卷

四明志宋羅濬撰續志宋梅應發劉錫同撰四明志前十一卷為郡志後十卷為所屬六縣志蓋明州雖建府而無倚郭之縣仍領疆土故也叙次頗不失古法續志名為郡志寔則錄吳潛一人之事迹詩詞殊乖體例以潛為名臣姑並存焉

澈水志八卷

宋常棠撰澈水鎮在海鹽縣東三十里紹定三年監稅官羅叔韶使棠為志首為輿圖次分為十四門雖稱八卷寔止四十四頁明韓邦靖朝邑縣志世稱絕作寔仿此書也謹案澈水雖見水經注然是書乃志地非志水不可入之山水中以鎮亦郡縣之分區故

附綴於都會郡縣類焉

景定建康志五十二卷

宋周應合撰自建炎二年即金陵為建康府遂為留都重鎮景定中知府事馬光祖屬應合刪補舊志為此書首為留都四卷如臨安志例次為圖表誌傳四十五卷次為補遺一卷體例詳明所考證皆有典據

景定嚴州續志十卷

宋鄭瑤方仁榮同撰原本但題新定續志不題嚴州蓋刊附紹興舊志之末而舊志佚也所記上起淳熙下訖咸淳叙次頗簡潔惟物產外增瑞產一門鄉飲外增鄉會一門以可以附錄之事而別出

為蛇足耳

### 咸淳臨安志九十三卷

宋潛說友撰說友人不足道而是書乃頗有條理前十五卷為行在所錄十六卷以後乃為府志體例與周淙志同其以宋代詔令置前代之後用漢志及玉臺新詠例也

### 至元嘉禾志三十二卷

元徐碩撰因宋志舊本廣其門目為三十三志中兼及松江府華亭縣蓋元時原隸嘉興路也序次賅洽辨定亦審碑碣一門多至十一卷知於金石文字考證最詳惟不立官師一門為畧所不當畧樓閣堂館亭宇析為三門為繁所不必繁

### 大德昌國州圖志七卷

元馮復京郭薦等同撰原本首有三圖故曰圖志今圖佚而志存分為八門其大指在翦削浮詞故簡而能括不在韓邦奇康海等所撰下也

### 延祐四明志十七卷

元袁桷撰分十二門義例謹嚴最有體要原本二十卷今第九卷第十卷第十一卷並佚

### 齊乘六卷

元于欽撰總括三齊輿地分為八類首尾淹貫而敘述不冗不漏在元代地志之中極為有法顧炎武山東考古錄嘗摘其謬誤一二事然不以累全書也



至正金陵新志十五卷

元張鉉撰根據宋周應合建康志凡例而撫戚光續志補宋以後事其譏戚志刪去地圖良是至周志世表年表深為蛇足戚志刪去寔合體例一概譏之則誤矣

無錫縣志四卷

不著撰人名氏考無錫由縣升州在元成宗元貞初由州降縣在明太祖洪武初此志稱無錫縣而所記鄉舉之年有至正辛巳是明初所修也其書分邑里山川事物詞章四大綱而區為二十三日頗簡而該

姑蘇志六十卷

明王鏊撰是書發端於吳寬張習都穆鏊與杜啟祝允明蔡羽文徵明等取寬未成之藁因其凡例共相釐訂計始終其事者皆一時者舊終有典型故在明人地志之中最為近古

武功縣志三卷

明康海撰是書削地志繁濫之例以山川城郭古蹟宅墓併入地理以官署學校津梁市集併入建置以祠廟寺觀併入祠祀而藝文則用吳郡志例散附各條故書止七篇而義例分明綱目具括

朝邑縣志二卷

明韓邦靖撰上卷四篇曰總志曰風俗曰物產曰田賦下卷三篇曰名宦曰人物曰襍記書止二十餘頁而上下數千年包括鉅細叙次點綴若有餘閒無局促束縛之迹明以來推為絕作信不虛矣

嶺海輿圖一卷

明姚虞撰凡十二圖首為廣東全圖次十府十圖終以南夷圖圖各有序首述沿革形勢利病次戶口田賦稅課次軍馬其總圖則首以職官而分統以布政按察二司其時巡撫猶為使臣也南夷諸國雖通市不通貢者亦載為海防計也蓋古之輿圖其體不過如此

滇略十卷

明謝肇淛撰分為十門雖大抵本圖經舊文然肇淛本文士又多見古書故引據有徵叙述有法體例特為雅潔

吳興備志三十二卷

明董斯張撰分二十六門皆徵引古書錄其原文有所考證則附著於下蓋用張鳴鳳桂勝之例後朱彛尊日下舊聞亦沿用之皆明其信而有徵也

欽定熱河志八十卷

乾隆二十一年奉勅撰凡二十四門熱河為塞北上腴遼金元以來皆陪京重鎮至我

聖祖仁皇帝建

避暑山莊以蒐狩朝覲

鑾輅歲臨我

皇上繩繼

前徽勤勞罔懈亦恒以夏秋

行幸奮武衛而柔藩封故是編所載非但山川風土壯

觀輿區即

盛典之頻仍  
宸章之繁富亦自古興圖所未有也

### 欽定日下舊聞考一百二十卷

乾隆三十九年奉  
勅撰于朱彝尊原本十三門外增苑囿官署二門而石  
鼓考併入國子監凡原本所引古書並刪繁補漏  
所列古跡並一一勘其所在證驗有無自古紀述  
都邑未有如是之徵寔不誣者也

### 欽定滿洲源流考二十卷

乾隆四十二年大學士阿桂等奉  
勅撰凡四門一曰部族述肅慎氏以下源流分合二曰  
疆域附以宮室建置及古蹟三曰山川列白山黑  
水諸名勝四曰

國俗附以官制及文字並仰稟  
睿裁援引舊文考驗地理據見聞之寔錄訂史傳之訛  
詞本本原原足信今而傳後

### 欽定皇輿西域圖志五十二卷

乾隆二十一年大學士劉統勳等奉  
勅撰嗣以西域版圖日擴規制日詳又隨事增修定為

今本凡二十門冠以  
天章四卷次為圖考列表畧度疆域山水官制兵防屯  
政貢賦錢法學校封爵風俗音樂服物土產藩屬  
雜錄分四十八卷千古未有之

武功與萬世永安之  
睿算條分臚載經緯詳明目見耳聞記載典核非馬遷  
班固徒傳聞于譯史法顯元奘多附會於佛書者  
所可比也

### 皇清職貢圖九卷

乾隆十六年大學士傅恒等奉勅撰以朝鮮諸國為首其餘諸藩諸蠻各以省分類次

聖武遠揚平定西域增入各部落三百餘種並繪圖系說釐為八卷自乾隆二十八年以後四裔之奉表入貢及款塞內附者又為續圖一卷並一一徵諸寔見非同前代之傳聞

謹案西域圖志於例當入邊防蒙古源流職

貢圖於例當入外記然

國朝威稜震疊萬國一家悉主悉臣無分中外西域已置郡縣職貢圖所載亦多郡縣之所屬未可區分畛域故皆錄載都會郡縣之中

### 欽定盛京通志一百卷

乾隆四十四年奉

勅撰

盛京舊有通志三十二卷敘述多所舛漏因命補正其書定為此本凡

開叛之鴻模  
征伐之舊迹一一縷述

留都掌故乃燦然明備其官名人地名音譯失真者並詳為釐訂尤足證舊志之訛

### 畿輔通志一百二十卷

國朝直隸總督李衛等監修因康熙十一年郭棻原本訂譌補漏凡分三十二門

謹案四庫全書編次體例凡官撰之書由

武英殿刊印者皆冠於

國朝著述之前各省通志雖撰錄不由詞館刊刻不由

內廷而皆於雍正七年奉

世宗憲皇帝諭旨纂修書成皆經奏進刊板藏貯布政司是亦官書也故今與官書一例編於私家著述之前又通志雖以總督巡撫董其事然不與纂錄視總裁官之領修有別故今皆不題其撰而題其監修從其定也監修每閱數官惟題經進一人唐宋以來之舊例也謹併發其凡後均仿此

### 江南通志二百卷

國朝兩江總督趙宏恩等監修司其事者中允黃之雋也較于成龍等舊志具有條理惟纂輯刊刻不出一手之雋唐堂集中嘗記其未校正者數事云

### 江西通志一百六十二卷

國朝江西巡撫謝旻等監修因康熙二十二年西江志舊本加以釐訂西江志卷帙雖繁而徵引皆有典故是書亦具有體裁

### 浙江通志二百八十卷

國朝浙江總督嵇曾筠等監修凡五十四門所引諸書皆具載原文標其名目近事未有記載者亦具列其案牘以示有徵較他志體例特善

### 福建通志七十八卷

國朝閩浙總督郝玉麟等監修黃仲昭八閩通志稱為善本然作於明之中葉疆域形勢歲久多更是書根據舊文歸於今制分為三十門如沿海島澳諸圖關於邊防阨塞皆詳繪補入尤足資考證

### 湖廣通志一百二十卷

國朝湖廣總督邁柱等監修是時已分湖南湖北為二仍併為一書者與上江下江總為江南通志同一例也其書分目三十一視康熙甲子舊志為詳惟開局武昌距長沙諸郡稍遠故湖北詳而湖南畧未為賅備云

### 河南通志八十卷

國朝河東總督王士俊等監修河南通志初自明嘉靖中粗具崖畧順治十八年續修始條理完具故康熙中嘗頒為志書之式是書依據舊志增葺新制亦頗有法度

### 山東通志三十六卷

國朝山東巡撫岳濬等監修於陸鉞張鳳儀二志多所補正門目亦多所分合其體例考證皆較勝於前人

### 山西通志二百三十卷

國朝山西巡撫覺羅石麟等監修康熙壬戌劉梅嘗因前明山西舊志為之補續採摭雖富外謬寔多此編因其舊文刪繁補漏司其事者為宜與儲大文大文夙講地理之學其發凡起例頗得體要

### 陝西通志一百卷

國朝陝西總督劉於義等監修陝西地志自三輔黃圖以下紀載較多明代諸府縣志亦多有體例故是編敘述考證皆能有所依據

甘肅通志五十卷

國朝甘肅巡撫許容等監修甘肅一省本以陝西分置古無專志新置諸縣尤舊籍無徵故是編較他志為簡畧蓋限於地也

四川通志四十七卷

國朝四川總督黃廷桂等監修西蜀自古為名都記載較為詳備而異同抵牾亦緣是以生是編雖未能釐剔無遺視舊志則考證者多矣

廣東通志六十四卷

國朝廣東巡撫郝玉麟等監修是書受詔於雍正八年六月告竣於九年五月視他省通志其成

廣西通志一百二十八卷

獨速故冗蔓舛駁在所不免然嶺南與記古籍多存終有所依據足資考證

國朝廣西巡撫金鉷等監修廣西在昔為蠻荒至昭代而羈縻之地咸入版圖其體制與古迥異舊記所載不過山川物產谿峒風俗而已故是編大旨以徵今為主也

雲南通志三十卷

國朝雲貴總督鄂爾泰等監修雲南先有康熙三十年舊志門目分合多不得宜叙述繁簡亦多不中節此編刪訂釐正較為條理分明

貴州通志四十六卷

國朝雲貴總督鄂爾泰等監修與雲南通志皆姚州知州靖道謨所撰而視雲南通志為簡畧蓋舊籍寥寥無所取材故也

### 歷代帝王宅京記二十卷

國朝顧炎武撰所錄皆歷代建都之制前為總論二卷後十八卷上起伏義下訖於元以時代為次仿雍錄長安志體例各詳載其城郭宮室都邑及建置年月事迹

### 蕭山縣志刊誤三卷

國朝毛奇齡撰以蕭山新志踏駁失考乃條舉其誤而辨之凡八十條偏隅私記本不必錄所以錄殿郡縣志者一使閱志書者知其附會夸飾大抵如此不可引為證據一使作志書者知無稽之談不

足當通人之考證可以知所戒也

右地理類都會郡縣之屬四十九部二千七百四十

六卷

### 水經注四十卷

水經舊題漢桑欽撰然證以書中地理寔三國時人其註則後魏酈道元作自明以來傳刻舛誤經注混淆今以永樂大典所載舊本重為校正補其佚脫者二千一百二十八字刪其妄補者一千四百四十八字正其臆改者三千七百一十五字雖宋本原佚之五卷不可復補較諸明刻亦可謂還其舊觀矣



### 水經注集釋訂訛四十卷

國朝沈炳異撰據明嘉靖間黃省曾所刻水經注博考諸書參以己意辨正其同異而詮釋之凡郡縣沿革皆註以今名雖不必一一皆確而積九年之力成此一書所得者亦頗不少

### 水經注釋四十卷刊誤十二卷

國朝趙一清撰是書用全祖望之說謂水經注原本注中有注本雙行夾寫今混為一殊為無據然剞此義例亦使經緯分明便於循覽其考補原佚五卷中二十一水亦確有佐證

### 吳中水利書一卷

宋單錡撰錡究心水利三十年據所目睹著為此書蘇軾嘗為奏進雖不見用然明夏原吉周忱皆

祖其遺法以成功據軾進狀稱原本有圖今已佚矣

### 四明它山水利備覽二卷

宋魏峴撰它山水在鄞縣灌溉七鄉惟患為江潮所汨唐時築堰以捍潮遂為永利歲久廢壞峴請於府重修因作是書上卷記源流規制及修築始末下卷為碑記與題詠

### 河防通議二卷

元沙克什撰素沙克什原作瞻思今改正原本久佚今從永樂大典錄出其書分六門門各有目凡物料工程丁夫輸運以及安椿下絡疊埽修堤之法一一咸備

### 治河圖畧一卷

元王喜撰原本久佚今從永樂大典錄出首列六圖圖末各系以說而附治河方畧及歷代決河總論二篇於後

### 浙西水利書三卷

明姚文灝撰大旨以南直隸之蘇州松江常州浙江之杭州嘉興湖州環居太湖最為卑濕圍田掩遏則水勢無所發洩而塘港湮塞因輯宋以來言浙西水利者纂為此編於諸家之言多所筆削棄取則以古今異宜也

### 河防一覽十四卷

明潘季馴撰首勅諭圖說次河議辨惑次河防險要次修守事宜次河源河決考各一卷次前人治

河之議與明代之奏章共九卷大旨總主於東水以刷沙

### 三吳水利錄四卷

明歸有光撰大旨以吳中之水宜專力于松江松江既治則太湖之水東下而他水不勞餘力因採集前人水議之善者七篇又自作水利論二篇以發明之而以三江圖附於其後

### 北河紀八卷紀餘四卷

明謝肇淛撰首列河道諸圖次列河程河源河工河防河臣河政河議河靈八紀至山川古蹟古今題詠則別為四卷名曰紀餘蓋治河之書以河為主與他地志例異也

### 敬止集四卷

明陳應芳撰應芳以秦州之人言秦州水利故以桑梓敬止之義為名其書集當時奏疏公牘私札附以六圖十三論其論又兼田賦漕運而言之

### 三吳水考十六卷

明張內蘊周大韶同撰萬歷四年命御史林應訓修濬三吳水利越六載藏事因命內蘊等編為此書凡分十二類詞不甚大而源流利弊一一分明

### 吳中水利書二十八卷

明張國維撰首七府水利總圖次諸水源委次菽文所記僅明一代事時世較近頗足以資考驗

### 欽定河源紀畧

勅撰乾隆四十七年奉

御製河源詩一章讀宋史河渠志一篇次圖次表次質實次證古次辨謠次紀事次雜誌蓋是年命侍衛祭告河神因西溯河源得於阿勒坦郭勒乃詔輯此編以正千古之疑悞

### 崑崙河源考一卷

國朝萬斯同撰此書作于康熙初尚未知河有重源然穿穴古書能知篤什按篤什原作都實今改正之謬誤其考證實勝諸家錄存其書益見御製河源詩文所論折衷精確足超軼萬古也

### 兩河清彙八卷

國朝薛鳳祚撰首為黃河運河二圖一卷至四卷論運河五卷六卷論黃河七卷採錄潘季馴崔維雅

之說八卷則鳳祚所著論四篇也其言率有實徵  
惟欲復海運殊為純繆

### 居濟一得八卷

國朝張伯行撰乃其總督河道時作前七卷論東省  
運河疏證最詳末一卷為河漕類纂則僅存梗槩  
蓋職在河不在漕也伯行平生著作惟此書切於  
實用

### 治河奏績書四卷

國朝靳輔撰卷一為川澤考漕運考河決考河道考  
卷二為職官考堤堰考及諸修防規制卷三為所  
上章奏及部議卷四為疏濬事宜皆親所閱歷之  
言

### 直隸河渠志一卷

國朝陳儀撰凡畿輔之水二十五皆巨流也但詳舉  
見在形勢不以徵考古蹟為長

### 行水金鑑一百七十五卷

國朝傅澤洪撰其書綜括古今臚陳利病上下數千  
年中地形之變遷人事之得失一一條析分明言  
水道者觀此一編足以見四瀆之大凡矣

### 水道提綱二十八卷

國朝齊召南撰召南以酈道元水經注詳北畧南黃  
宗義今水經又知南而不知北乃作此書以巨川  
為綱而以所會眾流為目故曰提綱大旨惟以今  
日水道為主不屑屑附會古蹟

### 海塘錄二十六卷

國朝程均廉撰統載浙江海塘形勢由漢唐以至乾隆二十九年一一臚載冠以

聖諭

聖製次為圖說次為疆域建築名勝古蹟祠祀奏議藝文雜誌八門頗為詳贍

### 右地理類河渠之屬二十二部四百七十卷

### 籌海圖編十三卷

明胡宗憲撰蓋為嘉靖中備倭而作所載南北沿海衝要日本入貢入寇始末及戰守經畧一一詳備宗憲雖依附趙文華攘奪戰功而嫻於軍旅其才寔不可沒蓋亦王越之流亞不以其人廢其書也

### 鄭開陽禕著十一卷

明鄭若曾撰若曾在胡宗憲幕中多所論著後其五世孫啟泓合為此編凡萬里海防圖論二卷江防圖考一卷日本圖纂一卷朝鮮圖說一卷安南圖說一卷琉球圖說一卷海防一覽圖一卷海運全圖一卷黃河圖議一卷蘇松浮糧議一卷其海防一覽圖即萬里海防圖之初藁以互有詳畧故兩存焉

謹案此書末二種與邊防之事無關然此書大旨以邊防為重二種特其附錄故仍入之邊防

### 右地理類邊防之屬二部二十四卷

### 南嶽小錄一卷

唐道士李冲昭撰案冲昭通志藝文畧作仲昭盖字之誤首列五峯三澗次叙宮觀祠廟壇院之屬而以歷代得道飛昇之跡附之雖黃冠自張其教不足為據然山志之中未有古於是書者亦圖經之所宜徵也

### 廬山記三卷附廬山紀畧一卷

宋陳聖俞撰原本五卷併冠以圖此本僅存前三卷勘驗永樂大典所闕亦同盖明初已佚也聖俞謫官南康時與劉渙以兩日之力徧遊廬山因取渙嘗所紀錄編為此書盖處處皆所目睹故考證精核與據圖作志者迥殊末綴宋釋慧遠廬山紀畧一卷不知何人所附六朝古籍今仍併錄焉

### 赤松山志一卷

宋倪守約撰首述皇初平兄弟仙迹次丹類次洞穴類次山水類次宮宇類次人物類次制誥類次碑籍類志山水而用郡縣輿記體例者自守約是書始

### 西湖遊覽志二十四卷志餘二十六卷

明田汝成撰是書雖以游覽為名而寔非游記大抵因名勝而附以事跡可以備史家之考核志餘則於南宋軼聞分門臚載兼及杭州之事不盡有關於西湖故別為一編盖有此以消納冗碎而後本書不病蕪雜是其體例之善也

### 桂勝十六卷桂故八卷

明張鳴鳳撰桂勝以紀山水各引證諸書叙述於前即以詩文附本條下於石刻題名之類搜采尤

詳桂故以紀故寔分郡國官名先政先獻遊寓雜志六門

謹案桂故乃志乘之流宜入都會郡縣以原本聯為一書鳴鳳原序又稱桂故輔桂勝以行故以桂勝為主入之於山水

### 盤山志二十一卷

國朝大學士蔣溥等奉勅撰盤山為畿東勝境僧智樸舊志冗蔓特甚乾隆十

九年

聖駕駐蹕

命溥等重輯是編分圖考名勝寺宇流寓方外藝文物

產雜綴八門而冠以

巡典

天章五卷巖壑增輝照映千古矣

### 西湖志纂十二卷

國朝大學士梁詩正撰乾隆十六年

聖駕南巡詩正請重修西湖志因

命以沈德潛所進本刪併為一其門目減於舊志而大

綱已包括無餘

### 右地理類山水之屬七部一百十三卷

### 洛陽伽藍記五卷

後魏楊銜之撰案楊或作羊未詳孰是魏自太和

以後洛陽佛刹甲天下永熙亂後銜之行役故都

感懷興廢因摺拾舊聞追叙故跡錄成是書以城

內及四門之外分叙五篇文詞秀逸且多附軼事

足資考證

吳地記一卷附後集一卷

舊本題唐陸廣微撰然廣微僖宗時人而書中稱錢氏諱鏐疑原本散佚後人鈔合而成有所竄入也所錄皆吳地古蹟後集一卷不知誰作其叙事止於大中祥符則北宋人也

謹案吳地記雍錄之屬名似乎省志長安志長安志圖之類名似乎郡縣志而寔皆考究古蹟與他志之體迥殊故今錄於古蹟之內蓋編次當循其寔不當循名而收如崇文總目以樹萱錄入種植也

長安志二十卷

宋宋敏求撰是書考長安古蹟於城郭宮室山川道里津梁郵傳言之最詳其坊市曲折及唐時士

大夫第宅所在一一能舉其處地志中之最精核者

洛陽名園記一卷

宋李格非撰或題李廌者誤也是書記洛中諸家別墅凡十九所叙述頗為雅飭

雍錄十卷

宋程大昌撰乾道淳熙間關中已久為金地故大昌此書惟據諸書諸圖參考而成於宮殿山水都邑皆有圖說而尤加意於險要蓋作是書時孝宗方有陰圖中原之志也

洞霄圖志六卷

宋鄧牧撰洞霄宮在餘杭縣大滌洞天為道書七十二福地之一此志乃牧入元以後遁居其地而



作凡六門曰宮觀曰山水曰洞府曰古蹟附以異事曰人物曰碑記舊本有圖故云圖志今圖則已佚矣

### 長安志圖三卷

元李好文撰一名長安圖記好文以至正四年再任陝西行臺治書侍御史取呂大防長安故圖刪除訛駁更為圖二十有二其中涇源圖說尤有裨於民事舊附刻宋敏求長安志後然圖本不為宋志而作兩不相應今仍各著錄焉

### 汴京遺蹟志二十四卷

明李濂撰濂以歷代都會皆有專志惟汴無之乃撫拾舊文編次成帙義例頗整齊引證亦具有根

據在明人地志之中尚為善本

### 武林梵志十二卷

明吳之鯨撰所述杭州古刹以城內城外南山北山及諸屬為綱以諸寺院分繫亦洛陽伽藍記之流惟後附天朝寵錫宰官護持古德機緣歷代勲績四門不出地志之積習

### 江城名蹟二卷

國朝陳宏緒撰皆記南昌名蹟以城內城外為斷去城遠者則不錄卷上為考古卷下為證今其古今不以年代為斷而以興廢存亡為斷叙次考證頗有可采惟喜載稗事時參以小說家言是其一瑕

### 營平二州地名記一卷

國朝顧炎武撰炎武游永平時郡人以志屬之炎武未應其求但采古來營平二州故寔為六卷付之原本散佚此其六卷之中古地名一卷也

### 金鰲退食筆記二卷

國朝高士奇撰士奇以康熙甲子入直內廷

賜居太液池之西朝夕往來訪求前明故蹟記其梗概為此書

### 石柱記箋釋五卷

國朝鄭元慶撰唐顏真卿所書石柱記在湖州杼山載其地山川陵墓古蹟頗詳歲久殘缺惟存三縣朱彛尊撫諸書補完其二縣元慶因為之箋釋

### 關中勝蹟圖志三十二卷

國朝陝西巡撫畢沅監修乾隆四十一年奏進其書以郡縣為綱系以地理名山大川古蹟四子目後附以圖

謹案四庫編纂之例自官撰諸書外其人存者皆不錄此編以經進

御覽故得從官書之例錄入然究為私撰而非勅修故仍與國朝著述叙年代先後不列於前

### 右地理類古蹟之屬十四部一百二十七卷

### 南方草木狀三卷

晉嵇含撰凡分草木果竹四類共八十種皆嶺南土產也叙述簡雅非唐以後人所能偽不得以隋

唐志皆不著錄為疑

### 荆楚歲時記一卷

梁宗慄撰舊本題晉人誤也據南史梁元帝本紀慄蓋楚人故述其鄉之土俗為此書凡三十六事其註相傳為隋杜公瞻作唐志有杜公瞻荆楚歲時記二卷其即註慄之書歟

### 北戶錄三卷

唐段公路撰案學海類編作公路蓋傳寫之訛是書載嶺南風土頗為賅備於物產為尤詳援據極為博洽所引之書今未見者十之七八也其註亦頗典贍題登仕郎前參軍龜圖撰不著其姓或公路之族歟

### 桂林風土記一卷

唐莫休符撰原本三卷今佚其兩卷目錄凡四十六條今亦佚其火山採木兩條其敘述風物頗為雅贍所載諸詩亦多他書所未及全唐詩所錄張固等十人詩即據此收入唐人著述傳世日稀不以殘闕廢也

### 嶺表錄異三卷

唐劉恂撰原本久佚今從永樂大典錄出所叙物產土風詞皆古雅於蟲魚草木訓詁名義尤為精核蓋於圖經之內兼有蒼雅之學焉

### 益部方物畧記一卷

宋宋祁撰乃祁知益州時因沈立劍南方物畧補其闕遺共得六十五種各為圖而系以贊併註其形狀於贊後今圖已佚惟贊與註存文詞古雅有郭璞山海經贊之遺

### 岳陽風土記一卷

宋范致明撰不分門目隨事記載書雖不過一卷而於郡縣沿革川原改易故蹟存亡考證特詳

### 東京夢華錄十卷

宋孟元老撰乃南渡之後追憶汴京之盛而作自都城坊市節序風俗及當時典禮儀衛靡不紀載雖不過識小之流而朝章國制定多襍見於其間

### 六朝事迹類編二卷

宋張敦頤撰蓋補金陵圖經而作凡十四門引據詳核其碑刻一門尤資考證惟書以六朝為名而南唐北宋之事往往闕入不免失於斷限

### 會稽三賦三卷

宋王十朋撰一曰會稽風俗賦一曰民事堂賦一曰蓬萊閣賦皆有闕會稽之風土嵎縣周世則嘗為註會稽風俗賦郡人史鑄病其不詳乃為增註併後二賦亦註之

### 中吳紀聞六卷

宋龔明之撰採吳中故老嘉言善行及風土人文為圖經所未載者彙為一編其體似乎小說寔則補地志之遺也

桂海虞衡志一卷

宋范成大撰凡十三篇於山川物產土俗民風皆敘述典雅無夸飾附會之習惟原書三卷此本僅存一卷蓋明人所刪併觀文獻通考四裔考中引桂海虞衡志幾盈一卷皆此本所無知其佚脫者多矣

嶺外代答十卷

宋周去非撰原本久佚今從永樂大典錄出蓋去非自嶺外代歸有問其土風物產者著此書示之代應對也大致與段公路劉恂范成大諸書相出入其邊帥法制財計諸門尤足補正史所未備

都城紀勝一卷

舊本題耐得翁撰不著名氏書成於端平二年皆記杭州瑣事分十四門不及夢梁錄武林舊事之賅備而詳畧可以互補

夢梁錄二十卷

宋吳自牧撰其書全仿東京夢華錄之體記南宋舊典及襟事雖拙於詞藻時襟鄙語而敘述特為詳備

武林舊事十卷

宋周密撰皆於宋亡之後追述軼聞自序稱欲如呂榮陽襍記而加詳如孟元老夢華而近雅足盡是書之長明人刻本多所佚脫此本從毛氏汲古閣元槧影鈔猶足本也

歲華紀麗譜一卷附牋紙譜一卷蜀錦譜一卷

元費著撰記蜀中節候風俗自元旦至冬至一一臚載蓋仿荆楚歲時記之體而於兵燹之餘追思繁盛寔有東京夢華之思末附牋紙蜀錦二譜二物皆蜀中所擅故併述及焉

吳中舊事一卷

元陸友仁撰皆記吳郡軼聞故蹟以補地志之闕頗能有所考證不但掇拾之學也

平江紀事一卷

元高德基撰所記皆吳中故寔而又兼及神仙鬼怪詼諧謠諺之事不全為地志亦不全為小說為例不純無類可隸姑錄之地理類雜記中焉

江漢叢談二卷

明陳士元撰其書於楚地故寔衆說異同者各設為問答以疏通證明故名曰叢談

閩中海錯疏三卷

明屠本峻撰所誌閩地水族凡鱗部一百六十七種介部九十種又非閩產而閩所常有者二種

益部談資三卷

明何宇度撰皆記蜀中山川物產及歷代軼事以體例不似圖經故名曰談資寔則地志之支流

蜀中廣記一百八卷

明曹學佺撰大致似通志而所分十二門則多類雜記不似通志之以疆域山川職官田賦為主採

撮頗為繁富

### 顏山雜記四卷

國朝孫廷銓撰廷銓家於益都顏神鎮採其地舊聞新事輯為此書分十有六目叙述瑣屑工於造語  
王士禎居易錄嘗以配田雯黔書

### 閩小記四卷

國朝周亮工撰襍記閩中物產民風頗及遺聞瑣事叙述雅令時時參以論斷亦頗名雋

### 嶺南風物記一卷

國朝吳綺撰宋俊增補江閩刪訂所叙嶺南風物簡雅不支與桂海虞衡志可相伯仲

### 臺海使槎錄八卷

國朝黃叔瓚撰蓋康熙壬寅叔瓚以御史巡視臺灣時作故以使槎為名凡三子目曰赤嵌筆談曰番俗六考曰番俗襍記

### 龍沙紀畧一卷

國朝方式濟撰式濟因省親至黑龍江記所見聞考核山川古蹟以成是書凡九門

### 東城雜記二卷

國朝厲鶚撰鶚居杭州城東之東園為宋代故址因旁考里中舊聞軼事與記所不載者為此書凡八十五條

右地理類雜記之屬三十部二百二十五卷

游城南記一卷

宋張禮撰禮以元祐元年與其友陳微明游長安城南訪求古蹟因作此書而自為之註辨證頗詳又有續註其下者不知誰作據註中所言蓋金末元初人也

河朔訪古記二卷

元納新撰案納新原作廸賢今改正乃至正三年北遊所記原本十六卷今從永樂大典錄出僅存二卷其一記真定路所見其一記河南路所見山川古蹟多今日輿記所未詳

徐霞客游記十二卷

明徐宏祖撰霞客其自號也少好游足跡幾徧天下嘗西行數千里求河源是編皆其紀遊之文舊本殘缺失次揚名時重為編訂以地理區分定為此本

右地理類游記之屬三部十五卷

佛國記一卷

宋釋法顯撰案通典引之作法明蓋避中宗諱改法顯於晉義熙中自長安遊天竺經歷三十餘國歸與天竺禪師參互辨定以成此書中多自尊其教之詞不足與辨其山川道里則未嘗不可資考核也

大唐西域記十二卷



唐釋元奘譯辨機撰元奘以貞觀三年求經西域歸而述所經歷辨機因編類成書所列凡一百八十三國多述佛典因果之事舉其地以寔之中第十一卷有明永樂三年太監鄭和一條核其上下文義乃後人附註傳寫者誤作正文也

### 宣和奉使高麗圖經四十卷

宋徐兢撰宣和六年遣路允迪使高麗兢為從官歸撰此書上之凡二十八門於其國地理風俗典章制度以及接待之儀文往來之道路一一具載惟所繪諸圖自南宋時已佚矣

### 諸蕃志二卷

宋趙汝适撰原本久佚今從永樂大典錄出蓋其提舉福建市舶時作所言皆海外諸國與宋史外

國傳相出入惟史詳事蹟此詳風土物產則正史之與雜記各有體裁爾

### 溪蠻叢笑一卷

宋朱輔撰溪蠻即武陵五溪蠻也輔常官其地據所聞見作為此書記其種類風俗頗備

### 真臘風土記一卷

元周達觀撰元貞元年遣使招諭真臘達觀隨行往返三載因述所聞見為此書

### 島夷志畧一卷

元汪大淵撰大淵於至正中嘗附海舶經數十國各紀其山川道里物產民風大半史所不載即載者亦不及其親見之詳

朝鮮賦一卷

明董越撰宏治元年正月越奉使至朝鮮五月還京述其風土為此賦併仿謝靈運山居賦例自為之注與明史朝鮮傳所言一一相符知其信而有徵

海語三卷

明黃衷撰衷籍南海晚歲家居訪番舶以海外之事因積所聞者為此書分四門曰風俗曰物產曰畏途曰物怪頗多恍惚奇怪之談天地之大何所不有未可遽以為誕也

東西洋考十二卷

明張燮撰所紀惟海國之通互市者與趙汝适諸蕃志同所錄西洋十五國附見者四東洋七國附

見者十二其不通互市者別為外紀又綴以稅餉舟師稅墻藝文逸事諸考則趙汝适書所未有也

職方外紀五卷

明西洋艾儒畧撰皆絕域土風為自古輿圖所不載故曰外紀凡分天下為五大州而冠以萬國全圖附以四海總說大抵山海經十洲記之流存之亦足廣異聞

赤雅三卷

明鄺露撰乃露游廣西徭峒因為徭女雲韞娘書記述所聞見為此書雖不免有所塗飾而山川物產序述簡雅寔不在桂海虞衡志下

朝鮮志二卷

不著撰人名氏蓋故明時朝鮮人作首叙疆域沿革為一書綱領次分六大綱為經曰京都曰風俗曰古都曰古迹曰山川曰樓臺而以所屬八道為緯其古迹多雜以神怪頗類小說其他遺聞瑣事則多中國史傳所未詳

### 坤輿圖志二卷

國朝西洋南懷仁撰與艾儒略職方外紀互相出入而亦時有詳畧異同大致不免有所粉飾而亦不盡出於虛構

### 異域錄一卷

國朝圖理琛撰康熙五十一年五月圖理琛奉使土爾扈特由喀爾喀俄羅斯至其地五十四年三月

御覽首冠還京述其道路所經進呈載以為目

### 海國聞見錄二卷

國朝陳倫炯撰倫炯少隨其父昂習知海道又歷官皆濱海重鎮故以所聞見著為此書上卷記八篇下卷圖六幅事事得諸閱歷視鄭若曾等據圖籍而談海防者固確有據焉

### 右地理類外紀之屬十六部八十九卷

協勘官編修臣祝 堃  
謄錄拔貢生臣陳謙光

